

Ysgrifennydd Cabinet yn agor ysgol newydd gwerth £38.3 miliwn ym Mhenfro



Mae ysgol uwchradd newydd sbon Penfro, sef Ysgol Harri Tudur, wedi cael ei hagor yn swyddogol gan Ysgrifennydd y Cabinet dros Addysg yn Llywodraeth Cymru, Kirsty Williams.

Mae Ysgol Harri Tudur yn disodli hen Ysgol Penfro, gan ddarparu addysg ar gyfer hyd at 1,463 o ddisgyblion, ynghyd â chanolfan awtistiaeth gyda 30 o leoedd.

Ariannwyd yr ysgol gwerth £38.3 miliwn ar y cyd gan Gyngor Sir Penfro a Llywodraeth Cymru, a hynny'n rhan o'r Rhaglen Addysg ac Ysgolion ar gyfer yr 21^{ain} Ganrif.

Mae'n cynrychioli'r buddsoddiad mwyaf yn y rhaglen hyd yma gan y Cyngor Sir, a gomisiynodd y cwmni adeiladu Bouygues UK i gyflawni'r prosiect adeiladu dwy flynedd o hyd.

Croesawyd Kirsty Williams gan Gadeirydd y Cyngor, y Cyng. Aden Brinn, a'r Pennaeth Mrs Fiona Kite.

“Mae gennym wisg newydd, diwrnod ysgol newydd, enw, logo ac arwyddair ysgol newydd, ac mae llais y disgybl wedi bod wrth galon ein penderfyniadau,” meddai Mrs Kite.

“Rydym yn credu bod gan holl ddisgyblion a myfyrwyr y gallu i gyflawni heb derfyn.

“Fe all ein plant yn Sir Benfro sefyll ar y llwyfan byd-eang ochr yn ochr ag unrhyw rai o’u cyfoedion.”

Yn dilyn perfformiad ardderchog gan gôr a cherddorfa'r ysgol o *Adiemus* gan y cyfansoddwr o Gymru, Karl Jenkins, gwahoddwyd Mrs Williams i agor yr ysgol yn swyddogol.

Dywedodd: “Rwyf wrth fy modd yn agor Ysgol Harri Tudur heddiw – prosiect gwerth £38.3 miliwn a ariennir ar y cyd gan Gyngor Sir Penfro a Llywodraeth Cymru, a hynny trwy ein Rhaglen Ysgolion ar gyfer yr 21^{ain} Ganrif.

“Dyma'r rhaglen adeiladu ysgol fwyaf uchelgeisiol ers y 1960au, a bydd yn golygu buddsoddiad cyffredinol o £1.4 biliwn. Mae ein disgyblion yn haeddu cael yr amgylchedd dysgu gorau ar gyfer eu datblygiad, ac mae Ysgol Harri Tudur yn sicr yn cyflawni hyn.

“Hoffwn ddiolch i bawb sy'n rhan o hyn oll, a dymunaf y gorau i'r staff addysgu a'r disgyblion ar gyfer eu dyfodol yn yr ysgol newydd gyffrous hon.”

Yna, cafodd Mrs Williams ei thywys o amgylch yr ysgol gan Ms Kite a'r brif ferch, Maria Janota, lle cafodd gyfle i gwrdd â myfyrwyr o wahanol ddosbarthiadau a sgwrsio am eu gwaith, ac i ofyn iddynt am eu barn ar eu hysgol newydd.

Wedi'i lleoli oddi ar Lôn y Fferi, mae'r ysgol wedi cael ei hadeiladu i'r safonau amgylcheddol uchaf. Mae'n lle croesawgar, ac iddo amgylchedd cysgodol a diogel. Mae'n cysylltu addysgeg a gofod i ddarparu ardaloedd ar gyfer dysgu cyfarwyddol, dysgu seiliedig ar ymarfer, a dysgu hunangyfeiriedig ac anffurfiol.

Mae gan ddisgyblion a staff fynediad hefyd at y ddarpariaeth TGCh ddiweddaraf, sy'n caniatáu amrywiaeth eang o ddewisiadau o ran adnoddau, a'r rheiny'n cael eu cyrchu mewn modd hyblyg.

Capsiwn 1

Yn y llun gwelir Kirsty Williams gyda myfyrwyr chweched dosbarth Verity Fletcher a Millie Hillier-Wood, ynghyd â Fiona Kite, Paul Culyer (Cadeirydd y **Llywodraethwr**), Ian Westley (Prif Weithredwr Cyngor Sir Penfro) a Cyng. Bob Kilmister, Aelod Cabinet gyda cyfrifoldeb am y rhaglen ysgolion ar gyfer yr 21^{ain} Ganrif.

Capsiwn 2

Yn y llun gwelir Kirsty Williams, Fiona Kite, Paul Culyer a Cyng. Aden

Brinn, Cadeirydd Cyngor Sir Penfro.

